

**D. JO. BURCHARDI  
MENCKENII ... ORATIO  
SECULARIS, DE VIRIS  
ERUDITIS, QUI LIPSIAM  
SCRIPTIS ATQUE...**

---

Johann Burkhard Mencke

5.5. 327

5.5.327





D. Jo. BURCHARDI MENCKENII,  
S. REGIÆ MAJ. POLON. CONSILIARII ET HISTORIO-  
GRAPHI, NEC NON HISTOR. PROF. PUBL. ET SOCIETA-  
TIS REGIÆ BRITANN. SOCII,

# ORATIO SECULARIS,

DE  
Viris Eruditis,  
qui Lipsiam scriptis atque doctrina  
illustrem reddiderunt,

IN  
ACADEMIA LIPSIENSI,  
EX DECRETO  
*RECTORIS MAGNIFICI*

ET  
*SENATUS ACADEMICI,*

Die IV. Decembris A. M DCC IX.

IN IPSA

JUBILÆI ACADEMICI

CELEBRITATE,  
*PRÆSENTIBUS SPLENDIDISSIMIS*  
*ATQUE EXCELLENTISSIMIS*

**DOMINIS LEGATIS,**

IN TEMPLO ACADEMICO

publice recitata.

---

LIPSIÆ, apud Jo. Frid. Gleditsch & Fil. M DCC X.



5000



*Potentissimi Regis Poloniarum atque Electoris  
Saxoniae, ac*

*Serenissimi Principis Heredis, nec non*

*Serenissimorum, & Reverendissimi, Ducum, Saxo-  
VVeissenfelsensis & Cizensis, Academia  
Nutritiorum,*

*Splendidissimi Domini Legati,*

*Legati item Summe Reverendorum Capitulorum  
& Academiarum celeberrimarum, decenti bo-  
noris cultu venerandi,*

*Utriusque Reipublica Proceres gravissimi,*

*Tuque circumfusa Studiosorum lectissima concio.*



Utorusquisque est vestrum, Auditores, qui cum  
nobilissimam hanc & per Europam univer-  
sam celebratissimam urbem, hæc recta, hos  
cives, contemplatur, singularem Divini Nu-  
minis bonitatem protinus non agnoscat, pla-  
neque sentiat atque admiretur? Absque enim Numine quis

A

fieri



fieri credat potuisse, ut hoc ipso in loco, qui nullo flumine portandis navibus apto irrigaretur, nec portu memorabili instructus esset, emporium hoc tam celebre tamque copiosum opibusque & mercibus affluentissimum suscitaretur. Quisquis autem Academiæ nostræ, quam jure optimo Germaniæ, quemadmodum ille Lugdunum Belgii, illustre miraculum dixeris, in qua jam a trecentis annis elegantiarum omnium sedes, literarum domicilium, Musarum ac Gratiarum augustissimum sacrarium fuit, quisquis inquam prima hujus Academiæ initia respiciat, facile intelliget, ea quæ tum facta sunt, nequaquam cœca quadam fortunæ sorte atque impetu, verum certissimo Dei T. O. M. consilio ita evenisse. Iniquissimo edicto (nostis enim, Auditores,) Pragensis Academiæ ordinem ac jura subruere Wenceslaus statuit, tumultuantur Doctores pariter & discipuli, discedunt non manipulatim, sed gregatim atque catervatim. Ecquis vero tot hominum milibus auctor fuit, ut postpositis florentissimis ea tempestate Germaniæ urbibus aliis, Lipsiam potissimum eligerent, in qua perinde ut apum examina confidentes, quam ingressi antea erant, studiorum rationem prosequerentur & absolverent? Istudne sine Numine factum esse creditis, Auditores? Potentissimos nemo non vocaverit germanos Fratres, FRIDERICUM BELLICOSUM & WILHELMUM, prudentissimos etiam, atque iis virtutibus, quæ ad Rempublicam pulcre regendam, ornandam, amplificandam pertinent, instructissimos, at iidem tamen de excitando sapientiæ & bonæ mentis templo nunquam forte in animum induxerant;

CUM

tum sensere divinum natum, Musasque e vicina Bohæmia exules & extorres, non modo non rejiciendas, verum etiam ultro adducendas invitandasque statuerunt. Quemadmodum vero exordia faustissima dedit Academiæ supremus rerum arbiter atque moderator Deus, ita decus ejus felicitatemque per trium seculorum seriem extulit, ut, cum eruditissimis hominibus liberalissimisque studiis continuo afflueret, nunquam non inter nobilissimas Germaniæ Academiæ præcipuo loco fuerit habita, totque paulatim ex illa prodierint Viri omni doctrinarum genere præstantissimi, ut, si quis ad exemplum Meursii, vel Woodi, quibus Athenas Batavas & Oxonienses debemus, Lipsienses Athenas consignare ausit, is subiturus sit profecto laborem immensum & humanis viribus longe superiorem. Equidem illis fidem habere nequeo, qui multa millia studiosorum juvenum e Pragensi in Lipsiensem Academiam venisse jactitant; a probatissimis tamen illius temporis scriptoribus \* traditum invenio, centum post inaugurationem annis in publica & solenni pompa, quam ipse Dux GEORGIUS ducebat, bis mille centum Magistros pariter juvenesque & in schola Thoma-na septingentos pueros, qui optimis artibus ad humanitatem informarentur, fuisse numeratos. Quam felicitatem tantum non perpetuam nobis fuisse, nemo rerum nostrarum non plane rudis inficiabitur: etsi enim tot subinde per Germaniam Academiæ præpullulaverint, bel-

A 2

laque.

\* v. Jo. Brotuffii *Chronicon Sax.* MS.

laque, pestem & clades alias cives nostri sæpe multumque fuerint perpesi, nunquam tamen Musæ prorsus has sedes destituere, nec desiderati sunt unquam Lipsiæ, qui cum ad docendum tum ad audiendum essent parati. Et habet hoc præcipuum prorsusque eximium Academia nostra, quod non modo tot Electorum Principumque munificentia plurimum debeat, sed quod etiam inter privatae sortis homines, nostræque imprimis Reipublicæ cives, Evergetas numeret plurimos, quorum nunquam est moritura memoria; quo fit, ut adolescentes studiosi prope quingenti, quibus nihil aliunde opis præsidive suppetit, publicis stipendiis alantur atque recreentur. Vestram testor fidem, optimi Juvenes, qui cum prope nudi &, quæ vestra calamitas, vix aliquot obolis instructi ad nos venistis, Mæcenates hic invenistis, a quibus & amictu victuque & rebus aliis, quæ ad vitam frugaliter ducendam pertinent, supra spem omnem atque expectationem donati estis. Etiam hoc leve putatis, Auditores, intra unius seculi, quod proxime præterit, spatium tot positas in publico triclinio mensas, quibus indigentiores bonarum artium alumni integro triennio gratis ac citra unius propemodum assis impendium sustentantur? Hoc leve putatis, a Rege, ab Academia, Senatu, Civibus denique ipsis haud modicas pecuniæ summas in studiose juventutis atque adeo ipsius Academiae fructum atque utilitatem liberaliter quotannis erogari? Nolite enim existimare, quenquam in hac urbe tam insipidum insulsumque

sumque reperiri, qui plurima commoda ex Academia quoque in omnis sexus atque ætatis homines ipsamque Rempublicam nostram universam uberrime redundare negaverit. Nam ut taceam, tot elegantissimos nobilissimosque juvenes, quibus lautior fors obrigit, non spernendas facultates ex aliis Germaniæ oppidis celebrioribus ultro tributas huc conferre, id quod Principis in Saxonia Viri judicio confirmare possem, si tantum nomen in hac umbra producere fas esset: ut taceam porro, plurimos eorum, qui huc confluxere, ut doctrinæ morumque præcepta a nobis haurirent, eadem & in liberos vestros, Cives, summo studio traducere, iisdemque optima virtutis femina a pueris instillare: istud certe prætermittendum non est, quod tot pii parentes, quorum liberi apud nos literis incumbunt, bene nobis precantur, proque fortunis nostris, pro flore atque incolumitate hujus Academiæ apud Deum immortalem assidue diligenterque intercedunt. Hinc & decus & honos & lætissima rerum omnium facies; nulli hic strepitus, nulli tumultus, rara inter utrumque Senatum dissidia, pacata, tranquilla, exoptata omnia. Sed de Academia atque hujus potissimum dici celebritate, qua splendidiorem augustioremque nunquam vel parentes nostros, vel nos ipsos videre contigit, in hoc tanto gravissimorum virorum ac literatissimorum hominum concursu, verba facere publicasque & solennes divino Numini gratias decernere iussus sum ab illis, quorum nutui voluntatique obtemperare religioni

duxerim. Quamobrem etsi sim in eloquentiæ studio plane nullus, quippe ab ingenio aliisque virtutibus, quæ Oratorem reddere queant disertum, parum instructus, vestro tamen judicio obtemperandum video, Patres conscripti, qui id muneris mei rationem postulare censuistis, ut ad exemplum Viri doctissimi, JOANNIS FRIDERICH, qui cum & ipse publice Historias explicaret, fata omnia & vicissitudines Academiæ inde a primis initiis luculenta oratione ante hos centum annos exponere jussus est, e superiorum temporum memoria quædam repeterem, quæ ad Academiæ nostræ gloriam augendam amplificandamq; plurimum pertinerent. Cum vero crambem bis coctam apponere longaue ac tædiofa oratione aures vestras offendere, Auditores, nolim, e tot eruditissimis Viris, quibus Lipsia inde a primis initiis coruscavit, paucos quosdam (quis enim omnes enumerare ausit?) producere in medium brevissimisq; elogiis hoc tempore exornare constitui; qua re illud consecuturum me arbitror, ut non minus Juvenes Studiosi exempla habeant, quæ quasi in illustri posita imitentur & sequantur, quam ut alii tantorum nominum memoria jucundissime afficiantur. Id dum paro, ad vos me converto, Auditores omnium ordinum honoratissimi, utque de Viris maximis incompro fermone dicturum vestra benevolentia atque favore tueri ne detrectetis, auresque vestras per breve temporis spatium benigne mihi commodetis, submississimo animo decenterque rogo atque contendo.

Non-

Nondum suas sedes hoc in loco Musæ collocaverant, nondum stabilita firmis legibus & fundata erat Academia, cum DANTES ALIGHIERIUS, Florentinus, bonarum artium & omnis eruditionis auctor atque instaurator illo tempore præcipuus, e patria exul Lipsiam accederet, luctuosamque DICEMANNI cædem elegantissimo carmine deploraret : cujus viri adventus prælusisse quodammodo videtur iis rebus, quæ centum post annis evenere, quo tempore tot Viri excellentissimi aliunde excitati in hanc urbem nostram magno literarum commodo confluxere. Ut itaque veniam ad eam ætatem, qua penitus consecrata fuit literis Philuræa nostra, non desunt etiam e vetustissimis, quorum memoriam conservari & ad posteros propagari fas est. Inter præcipuos ejus temporis Theologos memorant VINCENTIUM GRUNERUM, qui Fratribus Serenissimis, FRIDERICO & WILHELMO, auctor suasque fuisse perhibetur, ut Academiam hoc in loco excitandam decernerent. JOHANNIS vero HOFFMANNI, qui primus sacrarum literarum apud nos Professor extitit, in Misnensium postea Præfulatum evectus, ingens in Concilio Constantiensi nomen fuit ; nec minus quondam celebris NICOLAUS WEIGELIUS, qui non sacras modo literas, verum & Jura divina & humana, ipsamque Philosophiam omnem, eleganter pro genio sæculi explicavit, dignusque fuit habitus, qui & a Serenissimis Saxonæ Ducibus & a Martisburgensi Præsule ipsaque Academia nostra ad Basileense

con-

concilium ablegaretur, ubi habitis longe gravissimis orationibus incredibilem sui admirationem apud omnes concitavit. Non memoro sequentis seculi Duumviros clarissimos, VICTORINUM STRIGELIUM, cui ut antea e Salana, quæ ejus consiliis stabat, ita paulo post adventum suum e nostra quoque Academia, dubium num aliorum invidia, an sua culpa, emigrandum fuit, & JOANNEM PFEFFINGERUM, qui ut post GEORGII Ducis excessum purissimum Evangelii lumen inter Lipsienses nostros extolleret, nulli labori nullisque studiis aut vigiliis pepercit. De PETRO quoque MOSELLANO, qui GEORGII hujus jussu pia atque luculenta oratione præfatus est, antequam Lutherus hoc in loco cum Eccio pro vero sanctoque Dei cultu animosius congregaretur, & de CASPARO BOERNERO, qui circa eadem tempora Theologiam haud perfunctorie tractavit, rectius infra edisseram, ubi elegantiorum litterarum promotores præcipuos enarrare constitui. Celebrandus vero ante alios hoc loco est NICOLAUS SELNECCERUS, dignissimus Melanchthonis discipulus, quem *oculum Lipsiæ acerrimumque doctrinæ a Lutero instauratæ adversus Calvinum & Beza* *hyperaspisten* jure meritoque vocari, nemo inficiabitur. Nec forte prætereundus VINCENTIUS SCHMUCKIUS, de quo idem plane Henricus Hæpfnerus, quod de Nepotiano Hieronymus prædicabat, illum nempe assidua & diuturna lectione pectus suam bibliothecam Christi

sti

sti fecisse: etsi enim esset in dicendo adstrictior, nemo tamen doctrinam ejus desiderabit, qui vel nuper editos in Esaiam commentarios evolveret, e quibus viri pietas, candor, humanitas ubique elucet, ut optandum sit, ea quoque, quæ in Psalms, Matthæum item, Marcum & Lucam commentatus est, e tenebris, quibus sepulta jacent, in lucem aliquando produci. Nihil de GEORGIO WEINRICHIO, quem *Svadam Lipsiensem* vulgo vocant, nihil de POLYCARPO LYSERO dicam, qui Jesuitis nostros secessionis ab Augustana Confessione insimulantibus strenue acriterque cum summo Saxonix Theologo Matthia Hoe ab Hohenegg restitit. Magnus uterque, sed utroque major HENRICUS HOEPFNERUS erat, qui si nihil post se reliquisset, præter aureos illos *de justificatione & S. Cæna* commentarios, ut reliquit plurima, immortalem certe nominis sui famam apud omnes fuisset consecutus. Nec minor Hœpfnero discipulus Jo. HÜLSEMANNUS erat, qui, si quis alius, vera atque genuina divinx sapientix principia tanta prudentia atque facilitate exposuit, ut idem de eo, quod Quintilianus alicubi de Tullio, affirmare queamus: *ille se profecisse sciat, cui Hülsemannus valde placebit.* Quanta is dexteritate versatus est in conventu Lipsiensi, cum de Apologia Pupillæ Ordinum Evangelicorum adversus Pontificios adornanda consilia inirentur? Quanta prudentia moderatus est collo-

B

quium



quium Thorunense, cujus etiam historiam reliquit luculentissimam? HÜLSEMANNO discipulum & successorem adjungo HIERONYMUM KROMAYERUM, quo viro nemo fuit in rebus divinis apertior, ordinator, distinctior. Nemo Theologiam universam hoc ordine complexus, tam eleganter, tam concinne omnia disposuit atque explicavit; nemo melius reconditos Apocalypseos sensus eruit, evolvit, exhaustit; nemo illos, qui dulci pacis nomine fallentes quasvis male feriatorum hominum de religione sententias inter se commiscunt & quasi conturbant, fortius repressit, oppugnavit, confecit. Sed quid de MARTINO GEIERO dicam? in quo viro utrum prudentia incomparabilis, an modestia, vel doctrina ipsa magis celebranda sit, haud satis habeo compertum. Etenim quemadmodum in aliis doctrina, in aliis facundia, aut linguarum cognitio, præcipue commendatur, nec omnes, quod ajunt, omnia possunt, ita quamvis GEIERO nostro nihil eorum benignior natura negasset, quæ Theologum reddunt usquequaque consummatum, hoc tamen creditum est in eo singulare prorsusque eximium, quod rebus singulis, quæ ad explicandas sacras Literas requiruntur, ita fuerit instructus, ut plane ad ἐξήγησις natus factusque esse videretur. Et si Silesiis obstricta est Philuræa nostra, quod primus ex ea natione Rector, JOANNES OTTO MUNSTERBERGIUS, facultates suas plerasque omnes

omnes Collegiatis, quos vocant, Collegii B. Virginis & adolescentibus studiosis legavit, habebunt vicissim Silesii, quod GEIERO nostro, qui Lipsiæ natus fuit atque educatus, acceptum referant, cujus quippe consilii effectum est, ut Serenissimus Elector JOANNES GEORGIUS II pientissimum Cæsarem LEOPOLDUM missis legationibus expugnaret, quo sancta religio, quæ mortuo ultimo Piastorum Principe in Ducatu Lignicensi, Brigenfi & Wohlaviensi tantum non sepelienda erat, per complures annos sarta tectaue conservaretur. Quanta enim fuerit hujus viri apud optimum Principem auctoritas, & publice constar, & ego e mutuis utriusque Epistolis, quæ hodie in doctissimi Nepotis, Collegæ mei longe suavissimi, manibus sunt, non sine maxima animi delectatione cognovi. Sed ad reliquos propero, in quibus CHRISTIANUS & SAMUEL LANGIUS, Pater & Filius, occurrunt, qui tamen scriptis in lucem editis famam nullam quæsierint, inter principes tamen sui temporis Theologos doctissimosque & disertissimos Viros jure meritoque numerati sunt. Nec GEORGIUM MOEBIUM omiserim, qui si non aliis, quæ reliquit, scriptis excellentissimis, certe edito de Oraculorum Ethnicorum origine contra Antonium van Dale opere erudito oppido atque eleganti, nomen apud externos quoque laudemque non exiguum consecutus est, & præterea patriæ suæ, hoc est, Martis-

burgensium res gestas notatu digniores diligenter consignavit, quæ cum plurima contineant, in quibus Brottius feliciter emendatur, in Capituli Martisburgensis Archivo curatissime hodie custodiuntur. Sed inprimis transmittere nequeo Triumviros in divinis non minus quam humanis artibus clarissimos, RAPPOLTUM, SCHERZERUM & ALBERTI, quorum præceptis atque institutione plerique profecerunt, qui vel Theologiam vel Philosophiam magno plausu juvenumque studiosorum concursu hoc tempore apud nos profitentur. FRIEDERICUM RAPPOLTUM primo nominabam, qui ut in Poesi ita excelluit, ut nemo esset Poetarum veterum, quem non exprimeret felicissime, nemo recentiorum, quem non longissime superaret, ita Philologus quoque erat incomparabilis, & procul omni dubio in divinis quoque eximium quiddam præstiturus erat, (quanquam præstitit haud vulgaria,) si cum citius ex inferiori ad superiorem cathedram evocari contigisset. Subtilissimus Philosophus JOANNES ADAMUS SCHERZERUS erat, sed & Theologus perspicacissimus, qui tanta virtute acerrimos Ecclesiæ hostes, Keddium, Holterum, Schillerum, Dorffelium, Schefflerum, Bellarminum, tum Calvinianos inprimis & Socinianos oppugnavit, ut malleus hæreticorum jure optimo dicendus esset. De Alberto II Imperatore memorant, quod nunquam hilarior alacriorque fuerit visus, quam cum pugnam cum hoste

hoste ingrederetur, & SCHERZZRUS quoque noster, quoties conscendit cathedram, totus gaudio exultare visus, &, cum ad certamen veniretur, tanta celeritate adversarium undique adortus est, ut eum uno plerumque ictu prostraverit atque pessum dederit. Denique quid de VALENTINO ALBERTI dicam, Philosopho, Oratore, Poeta, Theologo quoque excellentissimo. Hunc virum, cui me ipsum quoque plurima debere profiteor, prolixissimis ad cælum laudibus extollerem, nisi me vestra, Auditores, præsentia brevitas admoneret. Et in omnium quidem manibus versatur, ut cetera non attingam, elegantissimus ejus libellus *de eo, quod Religionum inter est*, e quo summi Viri ingenium, doctrinam, prudentiam facile unusquisque velut ex ungue leonem cognoverit. Restant Jo. BENEDICTUS CARPZOVIVS, GEORGIUS LEHMANNUS & GOTTLÖB FRIDERICUS SELIGMANNUS, quorum ille animo virili ac forti, hi æquanimirate & modestia omnes sui temporis Theologos superabant. Ille in oratione potens, acutus, sonorus erat, hi lenes & prono fluentes alveo, ille multis, hi paucis libris in lucem editis illustres; omnes vero de Ecclesia Dei immortaliter meriti. Sed hæcenus plura ferme de Theologis dixi, quam temporis hujus patitur angustia, quare de ICtis, Medicis & reliquis strictius edisserendum mihi video. Non morabor quidem ex amplissimo ICtorum ordine illos, qui sub ipsis Academiae ini-

tiis floruerunt, in quibus primo utique loco nominandus foret JACOBUS RADEVITIUS, de quo, cum in Italia supremos in utroque Jure honores cum *PANORMITANO*, celeberrimo viro, capesseret, non vane in publica Panegyri dixit, quisquis dixit, *duo tum lumina accensa Italæ æque ac Germanis fuisse*. Nam ut *PANORMITANUS* magnum inter Italos nomen consecutus est, ita inter Germanos quoque RADEVITIUS parem suo tempore habuit neminem, tantamque de se opinionem concitavit, ut ipse FRIDERICUS BELLICOSUS ejus potissimum ingenio atque consiliis Electoralem dignitatem a Sigismundo Imperatore se consecutum fateretur. Taceo pariter THEODORUM A BURCKSDORFF, qui deinde Antistes Numburgensis, & ARNOLDUM WESTPHALUM, qui post maximas in Septentrione lites sua auctoritate compositas, Episcopus Lubecensis constitutus est. Celebratur vero inter ICTos clarissima imprimis stirps PISTORIORUM, e quibus SIMON, cum a præceptore suo Jasone Mayno frequentius audivisset verba illa: *calamus est, qui facit ICTum*, ad scribendum potissimum animum applicuit, inoque ob prudentiam, probitatem, doctrinam insignem, ingenium autem tantum, quantum id convenit existimari, quod summorum ICTorum ingeniis expetitur fuit, GEORGIO Duci commendatus, Professoris primum munus in hac Academia, postea & Cancellarii in aula Principis supremam dignitatem omnium consensu & suffragiis accepit. Quem  
virum

virum rebus humanis, aulæ non minus, quam Academia luctu ereptum, dubium fuit, utrum, quæ reliquit, Consilia & Responfa, an filii, HARTMANNUS & MODESTINUS, quorum alterum in scientia Juris parem, alterum tantum non superiorem habuit, reddiderint magis immortalem. Clarum quoque sub auspiciis superioris seculi LEOPOLDI HACKELMANNI nomen fuit, cujus *Quæstiones Juris Civilis, Pontificii, Feudalis & Saxonici* prostant satis luculentæ & elegantes. Nec minus clarus successor ejus erat SIGISMUNDUS FINKELTHUSIUS, qui cum ad Jura haud perfunctoriam literarum Græcarum scientiam attulisset (primus enim in hac Academia theses *περί ἀθανασίας ψυχῆς* Græce conscriptas publico examini exponere ausus est) in utriusque Juris studio felicissime progressus, præter Observationes practicas & Controversias Feudales, elucubratisimum de Jure Patronatus tractatum reliquit. Major tamen his ut nominis celebritate, ita doctrina atque eruditione BENEDICTUS CARPZOVIVS erat, qui sive divina sive humana jura tractaret, incredibilem sui admirationem apud omnes concitavit. Saxonum certe jura tanta gravitate explicavit, ut nulla sint in universa Saxonia nostra dicasteria, nulla Ictorum collegia, in quibus ad Carpzovium tanquam ad oraculum quoddam & tribunal continuo non recurratur. Sed nec BENEDI-

CTUS

CTUS hic postremus ex inclyta CARPZOVIORUM gente  
 ICTorum Lipsiensium ordinem nobilitavit: quando-  
 quidem vidit & Academia & mirata est AUGUSTI BE-  
 NEDICTI in dicendis sententiis dexteritatem atque  
 prudentiam. Nec nullum plane AMADEI ECKOLTI  
 nomen fuit, cujus compendiarium Pandectarum Tra-  
 ctationem dignam imprimis putavit summus apud  
 nos ICTus, BARTHOLOMÆUS LEONHARDUS  
 SUENDENDÖRFERUS, quam luculento commentario  
 illustraret. Et de utroque quidem SUENDENDÖRFE-  
 RO, Patre & Filio, cum multa dici possint, tum illud  
 præcipue memorandum, quod in consiliis prompti, in  
 decretis ferendis graves & circumspecti fuerint, longo-  
 que rerum usu edocti, nihil in omni jure perplexum,  
 nihil inexpeditum intricatumque reliquerint. De JA-  
 COBO BORNIO, quanto Viro! dicere non audeo,  
 cum præclara ejus facta, quibus nominis immortalita-  
 tem consecutus est, laudibus meis longe sint superiora.  
 Et facile eum multis laudum præconiis extollere super-  
 sedeo, quem non Academia modo, Senatus, Civitas, sed  
 ipsa etiam Aula, quid? universa Saxonia gravissime lu-  
 xit. Sed vel centum præterea enumerare possem Vi-  
 ros Juris scientissimos, qui quamvis ordini Professorio  
 adscripti non fuere, Philuræam nostram partim consi-  
 liis, partim editis in lucem doctissimis Commentariis  
 magno-

magnopere illustrarunt. Duos e multis nomino, JOANNEM PHILIPPI, aureo *de Subbstationibus* tractatu pluribusque scriptis aliis, quæ ad usum imprimis fori eleganter accommodavit, clarissimum, & FRIDERICUM BRUMMERUM, qui literas elegantiores cum Juris scientia felicissimo connubio conjunxit, quod neminem latere potest, cui ea, quæ *de Scabinis & ad Legem Cinciam* ingeniosissime commentatus est, familiarius innotuere. Et hunc quidem BRUMMERUM, cum in Gallia iter faceret, ignobili flumine suffocatum, rebusque mortalibus in ipso ætatis flore subito ereptum, æquis paulo literis faventior non doleat vehementer atque ingemiscat? Nec defuere porro Lipsiæ Æsculapii. Quoniam vero postremis hisce annis immutata & propemodum conversa fuit medendi ratio, tot secretioribus naturæ meatibus per microscopia, quæ veteribus minus innotuere, feliciter detectis, novisque factis experimentis, quibus hæc ars magno cum fructu hodie excolitur, non parum certe obscurata nunc videtur eorum, quos superior ætas tulit, memoria. Quare de GLODENSTEDIIS & MELLERSTADIIS multis ediscere, supervacaneum fuerit. Magnus erat superiori sæculo JOHANNES MICHAEL, nec habuit forte Lipsia in illa ætate, qui Chymica remedia vel inveniret felicius, vel ægris majori fructu propinaret. Nec ignobile PAULI AMMANNI nomen fuit,

C

qui



qui, desertis oportune veterum Botanicorum castris, ad Morisonii aliorumque exemplum plantarum cognitionem ex earum fructificatione ipsaque natura pulcrę atque eleganter derivavit. Excellentissimum fuit JOANNIS FRIDERICI ORTLOBII ingenium, quod vel ex sola partium & œconomix hominis, quam dedit, Historia abunde cognoscitur. Quid porro ANDREAM PETERMANNUM memorem? cujus in cadaverum sectione dexteritatem singularem, in ratiociniis formandis subtilitatem, miramque ad conficiendum adversarium ingenii celeritatem sapius mirati sumus. Quid CHRISTIANUM JOHANNEM LANGIUM? quem etli publice Lipsiæ profiteri fata haud paterentur, nemo tamen præter illum universam medendi artem ordinatius distinctiusque tradidit, ut multum utique magnifico & venerando Capiti nostro, AUGUSTO QUIRINO RIVINO, Medicorum filii vel eo imprimis nomine debeant, quod Opera ejus æternitate dignissima in publicam lucem protraxit. Quid de JO. CHRISTIANO SCHAMBERGERO dicam? qui, si ante diem his terris subductus, minus scriptis, vita certe reliqua, atque adeo ipsa etiam morte illustris fuit, Summa Viri in investigandis naturæ abditis industria, nunquam defessum studium fuit: quæ ex reconditis maxime hujus terræ nostræ secessibus ut educeret, & ex provinciis toto orbe a nobis remotis arcesseret, non labori non sumptibus pepercit. Privatam fere superabant

bant fortunam naturæ opes, quas in thesauris suis mira arte ac ordine jucundissimo digesserat, terræ, mineralia, lapides, metalla, conchæ, animalia rariora, partes animalium, atque hominis imprimis internæ, nova seculi nostri arte conservatæ. Quid instrumentorum, ad rerum naturalium studium ipsamque Medicam & Chymicam artem spectantium, justissimum dicam apparatus? Quid Bibliothecam instructissimam? Nihil omnino SCHAMBERGERO dixcris defuisse, nisi vita defecisset & otium, ad immortalia nomini suo monumenta condenda. At vel ita tamen etiam illius nomen ac memoria florebut; donec afflictis Professorum viduis annua e publico ærario pecuniæ porrigentur, quam rem ille solus tentavit, promovit, perfecit; donec & stabit splendidissimum Theatrum Anatomicum, quod eo potissimum autore magnifice exstructum, imaginibus & subfelliis exornatum, sceletisq; & rebus curiosis aliis auctum fuit, denique dum Academia nostra lugebit in ipso Rectoratus gravissimo munere extinctos. Sed primus hoc loco nominandus mihi erat MICHAEL ETTMÜLLERUS, immortale Academiæ hujus & æternum decus. Enimvero Vir optimus non nisi provectiore ætate libros diligenter expolitos edere atque interim ea comparare, decreverat, quæ experientia diuturnior pluriumque Auctorum lectio subministrarent; quod etsi ipse præstare haud potuit, morte quippe præventus, quam

C 2

Chy-

Chymicis experimentis minus succedentibus maturatam nonnulli credere, dici tamen non potest, quanta aviditate a iustis rerum harum aestimatoribus excepta fuerint, cruda licet & extemporanea, ejus Opera, quæ paulo post Viri obitum discipuli ejus in Belgio variisque Germaniæ oppidis evulgarunt, a Filio demum æmulo majori cura ex ipsis Autoris schedis recusa. Hæc & admirantur Itali, & Angli in epitomen redegere, Galli vero, qui alto supercilio despiciere solent, quicquid Germani pariunt eximium, ultro huic Viro supremum in Medicina Principatum tribuunt, cunctaque ad ejus præcepta, velut ad Lydium lapidem, referunt. Extollant Theologi suos HOEFFNEROS, GEIEROS, SELIGMANNOS, JCI suos CARPZOVIOS, SUENDENDÖRFEROS, BORNIOS, unus inter Medicos nostros ETTMÜLLERUS tantum huic ordini nomen ac decus apud omnes comparavit, ut is demum artem medendi ejusque vera atque genuina præcepta recte edoctus existimeretur, qui ea ab ETTMÜLLERO vel discipulis ejus addidicisset. Ad eos venio, quos Philosophos vulgo vocant, qui tum in iis studiis, quæ ab humanitate nomen acceperunt, tum in Eloquentia, ac genuina concludendi ratione, Moraliq; aut Physica disciplina, artibus item Mathematicis, Historia denique & Poesi excelluerunt. Neque vero licet e prima ætate CONRADUM CELTEM, HERMANNUM BUSCHIUM, JOHANNEM RHAGIUM ÆSTICAMPIANUM, VITUM

TUM WERLERUM, GREGORIUM HELTUM, JOANNEM MUSLERUM, GEORGIUM SODUM, LEONHARDUM BADEHORNUM, JOANNEM STURNUM, RICHARDUM CROCUM, inde e Britannia in Athenas nostras delatum, (de quo viro hoc unum memorare satis fuerit, quod magni Joachimi Camerarii præceptor existit) reliquosque de humanioribus literis egregie meritos, arcessere, de quibus alia occasione \* pluribus egimus. Nec nullo tamen cum elogio prætermittendus PETRUS MOSELLANUS, qui sive Græcos, sive Romanos scriptores attigit, omne tulit punctum, barbariemque nostris oris penitus expulit, ut, cum nemo antehac Græca, paucissimi Latina satis curarent, in MOSELLANI scholis tercentum quotidie Auditores numerarentur, qui harum literarum amorem ad alios deinde latissime propagarunt. Huic iterum hic comitem adjungo CASPARUM BOERNERUM, de quo testatur Georgius Fabricius, Vir elegantissimus, quod is solus fere Academiæ onus & spem literarum Lipsiæ suo tempore sustinuerit. Nemo certe a condita Academia inventus est, cui vel major esset ad promovenda publica ejus commoda animus, vel successus felicior. Is enim Academiæ Templum, Theatrum, Bibliothecam, Dicafterium, hortos, sylvam, stipendia, Theologis Auditoria, Professoribus habitationes, Studiosis triclinium comparavit. Nam

C 3

cum

\* In Dissert. nostra de Græcarum & Latinarum Literarum Institutionibus in Misnia.

exteris avidissime conquirerentur. Nec prætermittendi hoc loco doctissimi Duumviri, CASPARUS BARTHUS & THOMAS REINESIUS, qui cum Professorio Ordini neutiquam essent adscripti, Lipsiam tamen nostram magnopere illustrarunt. Quantum enim BARTHIO Latium, quantum Græcia REINESIO debeat, illius *Adversaria*, quorum alterum Volumen tanquam pretiosissimum thesaurum hæcenus ineditum custodit generosissima Einsideliana familia, & hujus Variæ Lectiones, literæ item ad Viros eruditos scriptæ, & *Eponimologium*, quod diu Eruditorum votis expetitur nunc tandem proditurum speramus, abunde testantur. Nec nullum inter Philologos nomen ANDREAS RIVINUS habuit, amplissimæ familiæ sator, quippe qui in iis artibus, quas humaniores vocamus, aut non tulit sua ætate aut non invenit parem. Atque his merito addimus JACOBUM THOMASIIUM, Virum nunquam satis Eruditis lugendum, nisi luctum nostrum quodammodo levaret Filiorum, quos post se reliquit, celeberrimorum par, CHRISTIANUS & GODOFREDUS, quorum dum Themidos alter, alter Hygieæ imprimis sacra curat, uterque non minus elegantiores literas ingenti studio promovet ac tuctur. Et magnus erat JACOBUS, quamvis præter ea, quæ de mundi exustione Pythagorica conscripsit, reliquisset omnino nihil; nunc cum

Mo-

Moralem disciplinam omnem, & quicquid Philosophiæ nomine complectimur, explicaverit luculentissime, & rem literariam multis elegantissimi argumenti dissertationibus, orationibusque & præfationibus exornaverit, inter principes certe Viros, quibus, non dicam Lipsia, sed Orbis Literatus universus plurimum debet, connumerandus erit. Inter Mathematicos, ut unicum nomen, clarissimus fuit quondam GEORGIVS JOACHIMVS RHETICVS, Copernici discipulus, qui & *Ephemerides* edidit, & *magnum Canonem* construxit, demumque Lipsia exul Cassovia inter amplexus summi Mathematici, Valentini Othonis, sexagenario major decessit; id quod ideo hoc loco monendum existimavi, quoniam plures eundem, de Martis motu assequendo desperantem, a malo genio, quem consuluisse ferunt, in turbinem actum, & alliso ad parietem capite necatum, absurde sinxerunt. Nec Historici nobis defuere, in quibus primo loco nominandus MATTHÆVS DRESSERVS, qui cum ex Melanchthonis schola prodiiisset, non tantum Græcas & Latinas literas, verum & eloquentiam & historias multo studio explicavit, & e Salana Academia, ubi in locum magni Lipsii successerat, Lipsiam evocatus, haud exiguum lumen intulit Academiæ, dignusque ante alios fuit habitus, cui Saxoniciæ historiæ pertendendæ provincia, constituto annuo stipendio, demandaretur.

Ut

Ut porro de FRIDERICO nihil addamus, quem luculenter consignasse Academia nostræ fata supra memoravimus, inter præcipuos certe CHRISTIANUS FRIDERICUS FRANCKENSTEINIUS eminet, quem Virum eruditissimum, eodem cum Camerario fato usum, solum sæpe in Auditorio publico aliquandiu spatium nostis, Auditores, dum unus postremo aut alter lento gradu adventans aurem illi attentam patienter præberet. At cum *πρωτικότητων* & in omni historia versatissimum existisse, si nihil aliud, pulcherrimæ ad *Præfatum* annotationes produnt, quibus utique ostendit, quantum ab illo promittere sibi historiarum cupidi potuissent, si vel digniorem suis lucubrationibus scriptorem elegisset, vel ipse ad scribendum rerum gestarum historiam animum applicuisset. Nec tacendus SETHUS CALVISIUS, quem primum in Chronologia nugari desisse, Josephus Scaliger, Isaac Casaubonus, quid? optimus quisque & in re chronologica versatissimus testatur. At hunc, postquam Professionis Publicæ munus, sæmel atque iterum ab exteris oblatum, modeste recusasset, tenui sorte contentum, apud nos omnem fere ætatem contrivisse, equis nescit? Poetas desideratis, Auditores? Ut CONRADUM BAVARUM, aliosque superiorum temporum Poetas excellentissimos, taceam, quis in carmine heroico sublimior FRIDERICO RAPPOLTO, quis in ele-

D

gia

NEDICTUM CARPZOVIVM, Poetam, Oratorem, Polyhistorum, omni laude dignum, sed omni majorem. Tanta enim illius fuit eruditio, ut, sive veteres Scriptores Græcos Latinosve interpretaretur, sive ad Tibulli, quem plurimum amabat, ingenium elegiam componeret, sive epistolam scriberet ad Amicos literatos, quos habebat in omni Europa præcipuos, nemo ei vel commentatione, vel carmine, vel epistola anteponendus esset. Sed, quod mirum, tanta præterea ejus fuit modestia, ut, quamvis sæpiissime ab Eruditis consultus, multorum lucubrationes consiliis atque opera ipsa egregie promoveret, vix unquam tamen adduci posset, ut nomen suum publice prostare pateretur, tantum abest, ut de edendis spissis voluminibus multum laboraret, sciolos illos, quibus manus & digiti pruriunt, nunquam non serio detestatus. Istud vero præcipuum plane habuit & quasi proprium, quod Mercurio Musis conciliato, primus in Saxonia commercia literaria instituit, unde de his, quæ exteri pararent aut agerent, accurate edoctus, ad nostros diligenter retulit, neminemque in Aula, Academia, Republica paulo doctiorem ignorare passus est, si quis in Republica Literaria eximium aliquid ac laude dignum esset conatus. Sed dum CARPZOVII laudes memoro, diu anxius cogitavi, utrum me Parentis quoque mei OTTONIS,

D 2

quem



quem acerba mors abhinc ferme triennio abstulit, mentionem facere consultum esset. Quamvis enim non ignorarem, complures ita existimare, quasi ille non omnino nihil ad ornandas bonas literas contulisset, metuebam tamen, neque id frustra forte, ne aliqui me arrogantiae aut levitatis ad minimum arguerent, qui me ideo Patris mei meminisse hoc loco putabunt, quod ad me sperarem aliquid redundaturum earum laudum, quæ illi jure meritoque ab omnibus tribuuntur. At quoniam in hac solenni Panegyri ea imprimis præmittere nequaquam decet, quæ ad famam ac gloriam Academiæ nostræ pertinent, non patiemini, ut arbitror, Auditores, ut intactum plane relinquam B. Parentem meum, qui illam, quantum in ipso fuit, haud parum provexit. Neque enim fraudandus est hac laude, quod primus is Germanorum de edendis Ephemeridibus eruditis consilia ceperit, susceptisque oportune in Belgium Angliamque itineribus, & præterea eruditissimis quibusque per Galliam, Italiam ac Germaniam Viris per literas conciliatis, exoptatissimum multorum votis Actorum Eruditorum opus non interrupto per annos viginti sex labore summaque & assidua cura in publicum emisit. Equidem ad ejus laboris societatem non illos modo, qui Lipsiæ, verum & qui in vicinis locis florent, invitabat, quo factum  
ut,

ut, cum pars operis haud contemnenda *Seckendorffio*, *Cellario*, *Tenzelio*, *Zsibirnbauſio*, *Knorrio* aliisque summis Viris extra Lipsiam viventibus debeatur, famæ tamen quicquid inde ac gloriæ ducitur, id ad Lipsiam unam, e qua Acta prodeunt, omnino redundet. Et si enim nostri æmulatione tot interea Diaria, tot Bibliothecæ librorum novorum, tot Nova, tot Excerpta literaria, sive Latino, sive Etrusco, Gallico, Belgico, Anglico, Germanico sermone prodierint, quorum quædam habent suos amatores, nemo tamen inficiabitur, Lipsiensium Diarium Orbis Eruditi universi plaustum hætenus præcipue meruisse, ut vel hoc nomine superius seculum Academiæ nostræ auspiciatissimum sit dicendum. Hos ergo tantos, tam elegantes, tamque eruditos Viros proprio & hæreditario quodam jure Lipsia nostra sibi vindicat, ut ad eius felicitatem nihil superesse videatur, quam ut a Deo immortalis, omnis bonitatis perenni fonte, enixissimis precibus contendamus, ut immortales Lipsiæ esse jubeat Theologos pios, ICtos prudentes, Medicos peritos, Viros denique in omni doctrinarum genere exercitissimos. Servet imprimis supremum Numen Potentissimum Polonia- rum Regem, FRIDERICUM AUGUSTUM, Dominum nostrum longe clementissimum, & hostibus, quos incredibili vi & stupendo ad posteros exemplo

prostravit, conculcavit, superiorent, divina porro gratia tucatur, ut quemadmodum de Augusto Imp. relatum legimus, quod, quam stramineam invenerat urbem Romam lapideam reliquerit, ita Lipsiam nostram, quam lapideam conspicimus, auream quondam, hoc est, felicissimam efficiat. Servet idem Numen cum Serenissima Matre atque Avia Serenissimum Principem juventutis, patriarum virtutum, ut nominis & ditionum, ex asse heredem, spem nostram, & decus, & meliorum literarum grande præsidium. Servet Serenissimos Saxoniarum Duces, Almarum Academiae Nutritios, Dominos nostros clementissimos, eosque diutissime in his terris magno Academiae commodo superstites esse jubeat. Floreat Saxonia! Floreat Lipsia, Academia, Senatus, Civitas! Floreant!  
Vigean!



005652234

CR

